

Digitalisacion di Padu su obranan musical ainda den proceso



ORANJESTAD – Den cuadro di Padu Lampe su di 98 cumpleaños a wordo presenta su buki, *Harmoniologia*. E obra aki di e polifacetico ‘Tata di Nos Cultura’ a wordo reedita pa medio di e fundacion Pa Promove Cultura di Aruba na honor di Padu Lampe. Nan ta percura pa salvaguardia e obranan musical, artistico y bibliografico di Padu.

Landa Henriquez kende ta presidi e fundacion aki a laga sa cu nan meta original ta esun pa promove cultura den general. Asina nan a cuminsa 18 aña pasa, tempo cu Padu a haci 80 aña. Na ocasion ey, nan a organisa un gran cel-

ebracion cu participacion di tur artista na Aruba y di tur hende, caminda nan a haci un gran concierto pa Padu na Cas di Cultura.

Tesoro cultural

E ultimo añanan nan a dicidi como fundacion cu Padu ta lagando un tesoro inmenso pa nos y cu nan no a wordo inventarisa y tampoco digitalisa debidamente. Awor e fundacion ta trahando pa logra e meta aki cu ayudo di artistanan local y otro profesional den e ramo musical. Nan a cuminsa inventarisa y digitalisa tur obra cu Padu ta lagando atras pa conserva nan debidamente. No solamente su obra musical, sino su obranan artistico den area di arte

plastico. Tambe su bukinan entre nan *Harmoniologia* cu a wordo traduci pa Belquis Moreu y coregi pa e linguista, Ramon Todd Dandaré.

Padu su obranan mas rico ta su musica cu ta increíblemente hopi. Mas cu 300 piesa musical, entre letranan y melodianan, algun di nan ainda no conoci. “Den nos inventarisacion nos ta bin haya masha hopi musica y letra cu nunca a wordo graba of skirbi”, sra. Henriquez a bisa na e matutino aki. Nan a bin haya riba cassette bieu cantidad di piesa di Padu. E musico tabata basa su musica riba cuarta y despues e tabata bay riba piano.

Inventarisacion y digitalisacion

Aunke nan ta trahado casi tres aña largo pa logra e meta di inventarisa y digitalisa e trabou artistico/cultural di Padu, pero te ainda e ta bay tuma un par di aña prome cu nan ta bin full cla.

Nos mesun musiconan profesional ta dunando un valioso aporte, y tambe eventual-

mente nan lo busca ayudo na Hulanda. E ta un trabou cu ta exige hopi, ya cu nan mester scucha tur cassette un pa un pa determina con lo wordo inventarisa pa despues bay skirbi nan. Ta un trayecto largo, pero ya nan a cuminsa y nan a yega un otro etapa. “Un step mas delanta. Nos ta bayendo riba bon caminda”, e di.

Continuacion riba Pagina 4



Digitalisacion di Padu su obranan musical ainda den proceso

Continuacion di Pagina 2

Sinembargo e no ta tribi di bisa cuanto tempo mas esaki ta bay dura. Pa e fundacion importante ta cu e ta wordo haci y nan ta hayando cada bes mas y mas sosten. Unda cu nan ta bati porta pa ayudo di e hendenan profesional riba e tereno aki, nan ta haye.

Tambe lo yega un momento cu e fundacion aki lo rekeri di aporte financiero di eventualmente otro fundacion cu ta facilita fondo pa e tipo di proyectonan cultural asina, ya cu nan mester paga cierto gastonan.

Presidente di e stichting aki conoci cariñosamente como 'Fundacion Padu' ta haci un

apelacion na publico pa tene cuenta cu e fundacion aki ta existi. Si nan kier haci un contribucion, esey semper ta yuda pa nan por adelanta cu gastonan na caminda. Un forma cu nan ta recauda fondo ta pa medio di CD cu e musica di Padu y cu e buki cu a wordo lansa siman pasa. Apesar cu e situacion ta un poco preta, e fundacion ta bin hayando hendenan priva cu tambe ta aporta, y nan ta spera di sigui conta cu nan y cu e cantidad por aumenta pa asina nan por bin cla cu e trabou di un caliber grandi aki.

Gradicimento

Padu su yiu muhe, Vivian Lampe, a gradici e presencia di un grupo di invitadonan cu a bay celebra un aña mas

di bida di e virtuoso yiu di tera na The Mill Resort. Cu e cumpra di un carchi nan a contribui cu e fundacion pa nan por tin fondonan pa sigui cu nan trabou pa percura mantene bibo semper Padu su memoria y herencia cultural pa e generacion venidero.

Den un bunita ambiente cu Bon Dia Aruba a presencia, sra. Lampe a expresa cu nan ta spera cu e cultura di Padu y e musica cu 72 aña largo e tin cu topa pa nos tur, cu esey por keda sigui. "Mañan e no t'ey mas cu nos. P'esey nos ta aki awe pa su musica si por keda pa semper den nos curason."

